

cur non in omnibus eundem belligerandi ardorem studiūque excitat, ut omnes libentissimi, nemo inuitus ad dimicationem descendat, biliosus præsertim? sunt, fateor, alij, quos non patriæ defensio, non publica salus, non aræ, non foci, sed auaritia, odium, iniuriæ, ambitio & insana falsæ gloriæ cupiditas, insatiabilis quædam habendi, & regnandi libido ad omnem audaciam impellit. Sed ne hi quidem sine magno consilio rem tantā aggredi, & gerere solent. neque uero cum rei bene gerendæ locus est, diutius sibi cunctandum & nouam e cœlo cometæ alicuius expectandam lucē ducunt. Nemo unquam bellum sine armis & copijs, raro sine pecunia, quæ neruus belli uocatur, gerere potuit. Num arma etiam & diuitias Cometes cum animo bellicoso cōfert? Iam si alterutrius exercitus tãtam rationem ducit, ut ibi necessaria omnia ad rem ex sententia conficiendam supeditet: cur tã alteri parti iniquus est, ut eam & copijs, & uiribus, & opibus, atq; adeo sæpe etiam fortibus animis atq; audacia, uictoria deniq; ipsa spoliet? An etiam perturbationibus Cometam distrahi censendum est, ut hos amore, illos odio sibi habendos, ob aliquam latentem causam, ducat? his fortitudinem & audaciã addat: illis ignauiam, torporem, timiditatem iniiciat? hos bile ardentem, bellicosos: illos phlegmate tardos, inertes, imbelles efficiat? O singularē Cometæ iniquitatē. Verū nō lubet pueriles has nugas pluribus refutare. Hoc satis sit ostendisse, multa requiri ad gerenda bella, quorum in cometen causa, ut & belli ipsius, nisi à parum intelligentibus conferri non potest. Adde illud quoq; quod est à uiris doctis firmis. rationibus demonstratum: corpora nostra non à cometarum solum crinibus, aut barba, aut cauda, sed ne ab ipso quidem cœlo, quod tamen inferiora cuncta cōplexu suo continet, aliter affici, quàm insita cuiusq; natura patiatur, illud quippe cū uniuersalis quædam et indeterminata causa sit, particularem eumq; definitum effectum, non nisi ex accidenti producere ualet.

In